

PROTOCOL DRAFFT AR GYFER CYNGHORWYR.

Ceisïa'r protocol drafft a ganlyn egluro rôl aelodau'r Pwyllgor Cynllunio ("y penderfynydd"), Aelodau Lleol a'r Cynghorwyr yn gyffredinol pe gwneir y penderfyniad i sefydlu un Pwyllgor Cynllunio i Wynedd unigol gyda phymtheg o aelodau:

1.1 RÔL CYNGHORWYR – DARPARIAETHAU CYFFREDINOL**1.2 CYFLWYNIAD**

- 1.2.1 Mae gan y Cyngor un Pwyllgor Cynllunio sydd â phymtheg o aelodau sy'n gwneud penderfyniadau ar y Ceisiadau Cynllunio hynny sy'n cael eu cyfeirio ar gyfer eu hystyried yn unol â Chynllun Dirprwyo Cynllunio Gwynedd
- 1.2.2 Fodd bynnag, yn amlach na pheidio, mi fydd Cais Cynllunio, yn unol â Chynllun Dirprwyo Cynllunio Gwynedd, yn cael ei benderfynu gan Bennaeth yr Adran Reoleiddio yn hytrach na'r Pwyllgor Cynllunio. Mewn sefyllfa fel hyn ni fydd gan yr aelodau hynny sy'n eistedd ar y Pwyllgor Cynllunio rôl i'w chwarae yn y broses o wneud penderfyniad.
- 1.2.3 O ran Cais Cynllunio sydd o fewn adran etholiadol yr aelod, neu'n sy'n effeithio ar yr adran etholiadol, mae modd i'r Cyngorydd ddefnyddio'r hawl i alw'r cais i mewn (er mwyn i'r cais cael ei ystyried gan y Pwyllgor Cynllunio yn hytrach na chan y Pennaeth Gwasanaethau Rheoleiddio).
- 1.2.4 Yn ogystal, gall Cyngorydd, yng nghyswllt Cais Cynllunio yn ei adran etholiadol neu sy'n effeithio ar ei adran etholiadol, fynychu cyfarfod o'r Pwyllgor Cynllunio pan fo'r cais hwnnw yn cael ei drafod er mwyn cyflwyno barn yr etholwyr y mae'n eu cynrychioli.
- 1.2.5 Mae'n bosibl y gall rôl a phŵer y Cynghorwyr gael eu cyfyngu pan fo gwrthdaro rhwng eu dyletswydd hwy fel cynghorwyr a'u diddordebau personol neu allanol.
- 1.2.6 Diffinnir y rolau a'r pwerau hyn isod, mewn mwy o fanylder.

2.1 RÔL Y PENDERFYNIDD

- 2.1.1 Pan fo Cyngorydd yn aelod o'r Pwyllgor Cynllunio ac yn cymryd rhan (neu'n bwriadu cymryd rhan) mewn cyfarfod o'r pwyllgor Cynllunio wrth drafod Cais Cynllunio penodol, yng nghyswllt y protocol hwn, mae o'n "Benderfynydd".
- 2.1.2 Bydd Cyngorydd sy'n Benderfynydd yn cydymffurfio â darpariaethau Cod Ymddygiad Aelodau.

3.1 RÔL YR "AELOD LLEOL"

- 3.1.1 Pan fo Cais Cynllunio sydd yn adran etholiadol Cyngorydd ger bron Pwyllgor Cynllunio, gall cyngorydd fynychu cyfarfod o'r Pwyllgor Cynllunio er mwyn cyflwyno sylwadau am y Cais Cynllunio hwnnw ar ran ei etholwyr, ac yng nghyswllt y Cais Cynllunio hwnnw, ef yw'r "Aelod Lleol".
- 3.1.2 Pan fo Cyngorydd yn aelod o'r Pwyllgor Cynllunio ni all fod yn Benderfynydd ar gyfer Cais Cynllunio sydd yn ei adran etholiadol. Mewn perthynas ag unrhyw gais yn ei adran etholiadol bydd pob Cyngorydd yn Aelod Lleol yng nghyd-destun y protocol yma.
- 3.1.3 Pan fo Cyngorydd am ba bynnag reswm yn methu bod yn bresennol mewn Pwyllgor Cynllunio pan fo cais ger bron sydd yn ei adran etholiadol, caiff drefnu i Gyngorydd arall fynychu'r Pwyllgor er mwyn cyflwyno sylwadau am y Cais Cynllunio ar ran ei etholwyr.

Mewn sefyllfa fel hyn, bydd y Cynghorydd hwn yng nghyd-destyn y Protocol hwn yn “Aelod Lleol” ar gyfer y Cais Cynllunio hwnnw.

- 3.1.4 Bydd Cynghorydd sy’n Aelod Lleol yn cydymffurfio â Darpariaethau Siarad Cyhoeddus a Chod Ymddygiad Aelodau. Ceir Darpariaethau pellach yn ymwneud a rôl yr Aelod Lleol yn rhan nesaf y Protocol

4.1 RÔL CYNGHORYDD NAD YW’N AELOD O’R PWYLLGOR CYNLLUNIO

- 4.1.1 Yn ddarostyngedig i ddarpariaethau Cod Ymddygiad Aelodau fel arfer, bydd Cynghorydd nad yw’n Aelod o Bwyllgor Cynllunio’r Sir (pa un ai yw’n bwriadu bod yn “Aelod Lleol” ai peidio) yn rhydd i:
- drafod unrhyw Gais Cynllunio gyda’r ymgeisydd / asiantgwrthwynebydd / grŵp lobïo ac ati;
 - mynychu unrhyw gyfarfod sy’n cael ei drefnu’n lleol yn ymwneud a’r cais;
 - mynychu unrhyw gyfarfod Cyngor Tref neu Gymuned ynghylch y cais a siarad am y cais (gan gynnwys mynegi barn un ai o blaid neu yn erbyn y cais) a (pe byddai’n aelod o’r Cyngor Tref neu Gymuned) pleidleisio ar y cais;
 - cyfnewid gwybodaeth sy’n berthnasol i’r cais gyda’r swyddog cynllunio.
 - Ceisio gwybodaeth / eglurder ynghylch y cais gan swyddog cynllunio.
 - Dylai gydymffurfio a rheolau lobïo adran 16 y Protocol hwn.

5.1 “GALW I MEWN”

- 5.1.1 Caiff cynghorydd (pa un ai yw’n Aelod o’r Pwyllgor Cynllunio ai peidio), yng nghyswllt Cais Cynllunio yn ei adran etholiadol, neu sy’n effeithio ar ei adran etholiadol, neu unrhyw ddau Gynghorydd arall (pa un ai ydynt yn Aelodau o’r Pwyllgor Cynllunio ai peidio), gyflwyno cais ysgrifenedig i Reolwr Cynllunio Gwynedd o fewn yr amserlen benodol er mwyn i’r Cais Cynllunio gael ei gyfeirio ar gyfer ei benderfynu gan y Pwyllgor Cynllunio. Fe ddylid cyflwyno rhesymau cynllunio eglur yn y cais ysgrifenedig ar gyfer cyflwyno’r Cais Cynllunio i’r Pwyllgor Cynllunio.
- 5.1.2 Pan fo Cynghorydd yn gweithredu ar ei hawl i alw Cais Cynllunio i mewn i’r Pwyllgor Cynllunio yn unol â 5.1.1 uchod, yr amserlen benodol ar gyfer rhoi rhybudd yw 16 diwrnod calendr o ddyddiad y llythyr o hysbysiad.
- 5.1.3 Pan fo dau Gynghorydd (nad ydynt yn Aelodau Lleol) yn defnyddio’u hawl i alw Cais Cynllunio i mewn i’r Pwyllgor Cynllunio yn unol â 5.1.1 uchod dylid anfon llythyr yn rhoi gwybod i’r Aelod Lleol.
- 5.1.4 Pan fo dau Gynghorydd (nad ydynt yn Aelodau Lleol) yn defnyddio’u hawl i alw Cais Cynllunio i mewn i’r Pwyllgor Cynllunio yn unol â 5.1.1, caiff un ohonynt fynegi ei farn ynghylch y cais penodol hwnnw. Bydd y Cynghorydd yn cydymffurfio â Darpariaethau Siarad Cyhoeddus a Chod Ymddygiad Aelodau.
- 5.1.5 Er mwyn osgoi amheuaeth pan fo Cynghorydd yn defnyddio’i hawl i siarad yn unol â 5.1.4 uchod mae hyn yn ogystal â hawl Aelod Lleol yn unol â 4.1.1 uchod.

6.1 PENDERFYNU YMLAEN LLAW

- 6.1.1 Dylai Cynghorydd sydd yn Benderfynydd fod yn ofalus nad yw’n gwneud penderfyniad ar y cais cyn iddo gael ei ystyried gan y Pwyllgor Cynllunio.

- 6.1.2 Felly, os yw Penderfynydd yn cefnogi canlyniad penodol yn gyhoeddus neu'n mynegi ei farn derfynol ar gais cyn i'r Pwyllgor Cynllunio gyfarfod, bydd hi'n anodd iawn i'r Penderfynydd hwnnw i osod dadl dda, pan fo'r Pwyllgor Cynllunio yn gwneud penderfyniad, ei fod ef neu hi wedi pwysu a mesur y dadleuon yn ofalus. Y ffordd fwyaf priodol ar gyfer aelod o'r fath fyddai gwneud datganiad agored cyn i'r eitem gael ei hystyried gan y Pwyllgor Cynllunio, peidio siarad na phleidleisio a gadael y siambr yn ystod y drafodaeth ar yr eitem honno. Byddai peidio â gwneud hyn yn arwain at Adolygiad Barnwrol neu gŵyn i Ombwdsman Llywodraeth Leol.

7.1 CYSYLLTIAD UNIONGYRCHOL CYNGHORWYR GYDAG YMGEISWYR AC ERAILL

- 7.1.1 Os yw Cynghorydd yn rhoi cyngor i ymgeiswyr, asiantau, gwrthwynebwyr neu unrhyw bartion eraill sydd â diddordeb ynghylch pa mor debygol yw hi y caiff bwriad cynllunio ei ganiatáu, ni chaiff y Cynghorydd fod yn "Benderfynydd" pan drafodir y ceisiadau cynllunio hynny sy'n berthnasol i'r bwriad a bydd angen ystyried a yw'n disgyn o fewn categori o fod yn Aelod â Diddordeb sy'n Rhagfarnu.
- 7.1.2 Dylai aelod sy'n dymuno sicrhau ei fod yn aros yn gymwys i fod yn "Benderfynydd" gynghori'r ymgeiswyr arfaethedig i gysylltu â Swyddog Cynllunio am gyngor ar rinweddau y cais a threfniadau.

8.1 DYLAI AELODAU DDERBYN CYNGOR

- 8.1.1 Pe byddai Cynghorydd yn amau lle mae'n sefyll o dan y Protocol hwn neu God Ymddygiad Aelodau, dylai ofyn am gyngor y Swyddog Monitro pob tro.

RÔL Y "PENDERFYNIDD"

9.1 DYLETSWYDDAU'R "PENDERFYNIDD"

- 9.1.1 Ar gyfer unrhyw Gais Cynllunio sy'n cael ei drafod gan y Pwyllgor Cynllunio:
- **ni ddylai'r** Penderfynydd lobïo na dylanwadu na cheisio lobïo na dylanwadu unrhyw Benderfynydd arall neu Bennaeth Gwasanaethau Cynllunio ynghylch Cais Cynllunio o'r fath nac ychwaith unrhyw benderfyniad a wneir cyn y Pwyllgor Cynllunio sy'n ystyried a phenderfynu ar y cais hwnnw.
 - **ni ddylai'r** Penderfynydd dderbyn unrhyw anrhegion na lletygarwch gan unrhyw un sy'n gysylltiedig â Chais Cynllunio o'r fath a dylai weithredu'n syth i gofrestru unrhyw gynigion, anrhegion neu letygarwch a wrthodwyd yn y Gofrestr a gedwir yn bwrpasol ar gyfer hynny gan Bennaeth yr Adran Democratiaeth a Chyfreithiol.
 - **ni ddylai'r** Penderfynydd dderbyn na dangos y byddai'n fodlon derbyn unrhyw lythyr, pamffled neu unrhyw ddeunydd ysgrifenedig arall (gan gynnwys e-bost neu ffacs) sy'n ymwneud a Chais Cynllunio cyn iddo gael ei benderfynu gan y Pwyllgor Cynllunio. **Pan fo Penderfynydd yn derbyn deunydd o'r fath am ddim fe ddylai ei anfon ymlaen at y Pennaeth Gwasanaethau Rheoleiddio yn ddi-oed (a fydd yn rhoi gwybod i'r sawl y'i hanfonodd yn y lle cyntaf, os yn hysbys, fod y deunydd wedi cael ei anfon ymlaen iddo ef ac y bydd yn cael ei gyfeirio ato, os yn briodol, yn Adroddiad Pwyllgor y Swyddog) ac yn datgelu ei hun ei fod wedi derbyn y deunydd hwn yng nghyfarfod priodol y Pwyllgor Cynllunio.**

- **ni ddylai'r** Penderfynydd fynychu unrhyw gyfarfod, cyfarfod Briffio na Thrafodaeth sy'n ymwneud â Chais Cynllunio o'r fath sydd ddim yn cael ei drefnu gan na'i fynychu gan Pennaeth Gwasanaeth Rheoleiddio neu fel arall wedi'i awdurdodi yn ysgrifenedig gan y Swyddog Monitro a dylai barchu'r darpariaethau sy'n ymwneud a mynychu cyfarfodydd cyhoeddus yn adran 10 isod.
 - **ni ddylai'r** Penderfynydd ddangos na mynegi'n gyhoeddus neu'n breifat y penderfyniad tebygol neu rinweddau / gwrthwynebiadau i Gais Cynllunio o'r fath cyn i'r Pwyllgor Cynllunio ystyried a gwneud penderfyniad ar y Cais Cynllunio hwnnw. **Pan fo Penderfynydd yn gwneud hyn, fe ddylai dderbyn cyngor gan y Swyddog Monitro ynghylch a ddylai barhau i fod yn Benderfynydd ai peidio.**
 - **ni ddylai** ymrwymo naill ffordd na'r llall o ran y Cais Cynllunio cyn iddo gael ei ystyried gan y Pwyllgor Cynllunio. **Mae'n hanfodol bwysig fod Cynghorwyr yn mynychu cyfarfodydd gan gadw meddwl agored a'u bod yn medru dangos hynny;**
 - **ni ddylai** ddod a chyflwyniadau manwl gydag ef i'w darllen i'r cyfarfod. **Gallai hyn awgrymu fod y Cynghorydd wedi gwneud penderfyniad un ai o blaid neu yn erbyn cais cyn mynychu'r cyfarfod.** (argymhellir y dylai Cynghorwyr wneud nodiadau o bwyntiau sy'n codi yn y cyfarfod ar gyfer eu defnyddio mewn cyflwyniadau).
 - **Ni ddylai** bleidleisio na chymryd rhan yng nghyfarfod y Pwyllgor Cynllunio od nad yw wedi bod yn bresennol i wrando ar y drafodaeth yn ei chyfanrwydd, gan gynnwys cyflwyniad y swyddog i'r cais.
 - **Ni ddylai** ddychwelyd i'w sedd yn ystafell y Pwyllgor Cynllunio (ar ôl gadael yr ystafell neu'r siambr cyn i'r drafodaeth ar y cais ddechrau neu yn ystod y drafodaeth) nes bod y drafodaeth ar y cais penodol hwnnw wedi dod i ben.
 - **Ni ddylai** gynnig, eilio na chefnogi penderfyniad sy'n groes i'r Cynllun Datblygu neu argymhellion Pennaeth Gwasanaeth Rheoleiddio heb adnabod ac ynganu'n glir y rhesymau sy'n cefnogi'r penderfyniad sy'n cael ei gynnig. **Dylid cyflwyno'r rhesymau hynny cyn y bleidlais a dylid eu cynnwys yn y Cofnodion.**
 - **Ni ddylai** gynnig gohirio'r Cais Cynllunio heb adnabod ac ynganu'n glir y rhesymau i gyfiawnhau gohiriad o'r fath. **Dylid cynnwys y rhesymau hynny yn y Cofnodion os yw'r cais cynllunio yn cael ei ohirio.**
 - **Ni ddylai** bleidleisio ar y cais mewn cyfarfod Cyngor Tref neu Gymuned cynharach. **Pe byddai Penderfynydd yn gwneud hyn, fe ddylai geisio cyngor gan y Swyddog Monitro ynghylch parhau i fod yn Benderfynydd ai peidio.**
- 9.1.2 **Bydd Cynghorydd sy'n Aelod o'r Pwyllgor Cynllunio ac yn dymuno ymgymryd â rôl "Aelod Lleol" ar gyfer Cais Cynllunio sydd i'w drafod gan y Pwyllgor Cynllunio yn cydymffurfio â darpariaethau'r Protocol hwn sy'n berthnasol i "Aelod Lleol" yn enwedig y rhai yn adrannau 4 a 13.**
- 9.1.3 Bydd Cynghorydd sy'n Aelod o'r Pwyllgor Cynllunio yn cydymffurfio â **Chod Ymddygiad Aelodau** ac yn cael ei atgoffa'n benodol os oes ganddo un o'r hyn a ganlyn mewn perthynas â Chais Cynllunio sydd i gael ei drafod gan Bwyllgor Cynllunio:-
- (i) Diddordeb Personol – y gofynion o ran datgan;
 - (i) Diddordeb sy'n Rhagfarnu - yr angen i gael gollyngiad gan y Pwyllgor Safonau - neu fel arall peidio ag ymgymryd â rôl y Penderfynydd.

10.1 PAN FO PENDERFYNYDD YN DEFNYDDIO'I HAWL I ALW CAIS I MEWN

10.1.1 Pe byddai cais cynllunio penodol yn cael ei alw i mewn i gael ei benderfynu gan y Pwyllgor Cynllunio o ganlyniad i gais gan Aelod o'r Pwyllgor, yna mae angen i'r Aelod hwnnw ystyried yn ofalus pa rôl y dylai chwarae pan fo'r Pwyllgor Cynllunio yn ystyried a phenderfynu ar y cais dan sylw. **Yn arbennig felly pan fo Aelod o'r Pwyllgor Cynllunio sydd wedi gwneud cais i alw i mewn:-**

- Wedi geirio'r cais i Alw i Mewn, mewn iaith fyddai'n awgrymu ei fod wedi llunio barn glir yn barod o ran canlyniad priodol y cais; neu
- Wedi gwneud y cais Galw i Mewn ar ôl trafod gyda'r ymgeisydd/asiant/gwrthwynebwr ac/neu unrhyw drydydd parti (gan gynnwys Cynghorydd arall pe bai'n Aelod o'r Pwyllgor Cynllunio ai peidio) dylai'r Aelod geisio cyngor gan y Swyddog Monitro ynghylch parhau i fod yn Benderfynydd.

11. RÔL YR "AELOD LLEOL"

11.1 DYLETSWYDDAU'R "AELOD LLEOL"

11.1.1 Pan fo Cynghorydd yn gweithredu fel Aelod Lleol (pa un ai yw'n Aelod o'r Pwyllgor Cynllunio ai peidio):

- Ni ddylai eistedd gydag Aelodau o'r Pwyllgor Cynllunio, wrth fynychu cyfarfod o'r Pwyllgor Cynllunio sy'n trafod y Cais Cynllunio dan sylw, a dylai aros hyd nes y gelwir arno i siarad yn rhan y cyhoedd o'r ystafell.
- Ni ddylai siarad gydag unrhyw Aelod o'r Pwyllgor Cynllunio am y Cais Cynllunio dan sylw, un ai yn ystod y cyfarfod Pwyllgor neu fel arall.
- Yng nghyswllt y cais dan sylw a chyda chaniatâd y Cadeirydd, caiff ymateb i gwestiynau Aelodau'r Pwyllgor, yr ymgeisydd neu ei asiant ac unrhyw barti arall sy'n cael caniatâd i siarad yn ystod y cyfarfod.
- Ni ddylai dderbyn unrhyw anrheg na lletygarwch gan unrhyw un sy'n gysylltiedig â'r Cais Cynllunio dan sylw a dylai weithredu heb oediad i gofrestru unrhyw gynigion o anrhegion neu letygarwch a wrthodwyd yn y Gofrestr a gedwir yn bwrpasol ar gyfer hynny gan Bennaeth yr Adran Democratiaeth a Chyfreithiol.

11.1.2 Disgwylir i Aelodau nad ydynt ar y Pwyllgor Cynllunio dderbyn hyfforddiant a ddarperir gan y Cyngor o leiaf unwaith y flwyddyn er mwyn eu galluogi i gyflawni eu rôl fel Cynrychiolydd Lleol yn gywir.

11.1.3 Dylai Cynghorydd yn gweithredu fel Aelod Lleol ac sydd angen gwybodaeth bellach am y Cais Cynllunio gysylltu gyda'r swyddogion cynllunio perthnasol ac nid Aelodau'r Pwyllgor Cynllunio.

12.1 HAWLIAU "AELOD LLEOL"

12.1.1 Er mwyn osgoi unrhyw amheuaeth caiff hawliau Aelod Lleol eu cynnwys yn Adran 4.1.1 y Protocol hwn dan y pennawd "Rôl Cynghorydd nad yw'n Aelod o'r Pwyllgor Cynllunio"

13.1 LOBÏO

13.1.1 Mae'n bwysig sylweddoli fod lobïo yn rhan arferol a phriodol iawn o'r broses wleidyddol. Bydd y rhai sy'n cael eu heffeithio gan y penderfyniad cynllunio yn aml yn ceisio cael dylanwad arno wrth fynd at aelod ward etholedig neu at aelod o'r Pwyllgor Cynllunio. Dywed Trydydd Adroddiad Pwyllgor Nolan "It is essential for the proper operation of the Planning system that local concerns are adequately ventilated. The most effective and suitable way this can

be done is via the local elected representatives, the Councillors themselves”.

- 13.1.2 Fodd bynnag, heb ofal a synnwyr cyffredin gan bawb sydd â diddordeb, fe all lobïo o'r fath arwain at gwestiynu amhleidioldeb a gonestrwydd Cynghorydd.
- 13.1.3 Wrth gael ei lobïo dylai'r Penderfynydd ofalu wrth fynegi barn all gael ei ddehongli fel pe bai wedi gwneud ei feddwl i fyny yn barod cyn iddynt weld y dystiolaeth i gyd. Fe ddylent sicrhau mai dim ond cyngor trefniadol sy'n cael ei roi.
- 13.1.4 Argymhellir na ddylai Cynghorwyr lobïo Cynghorwyr sy'n aelodau o'r Pwyllgor Cynllunio ynghylch eu pryderon neu eu barn nac ychwaith geisio eu perswadio i benderfynu pa ffordd i bleidleisio cyn y cyfarfod ble y bwriedir gwneud penderfyniad cynllunio.
- 13.1.5 Ni ddylai Cynghorwyr benderfynu na thrafod sut i bleidleisio ar unrhyw gais mewn unrhyw fath o gyfarfod grwpiau gwleidyddol, na lobïo unrhyw aelod i wneud hynny. Ni ddylai Cyfarfodydd Grwpiau Gwleidyddol byth reoli sut y dylai Aelodau bleidleisio ar fater cynllunio. Ni ddylid cynnal Cyfarfodydd Grwpiau Gwleidyddol cyn pwyllgorau cynllunio.

14. HYFFORDDIANT

14.1 Hyfforddi Aelodau'r Pwyllgor Cynllunio

- 14.1.1 Bydd y Cyngor yn sicrhau fod Aelodau'r Pwyllgor Cynllunio yn cwblhau hyfforddiant cyflwyno yn foddhaol cyn dechrau gwasanaethu ar y Pwyllgor Cynllunio ac o dro i dro eu bod yn ymgymryd â hyfforddiant ychwanegol / gloywi yn unol â rhaglen hyfforddiant sydd wedi'i gytuno gan y Cyngor.
- 14.1.2 Bydd cofnodion presenoldeb mewn digwyddiadau hyfforddiant yn cael eu monitro. Bydd adroddiad yn cael ei gyflwyno i'r Prif Bwyllgor Craffu pob chwe mis ynghylch presenoldeb aelodau mewn digwyddiadau hyfforddiant. Ni fydd aelod o'r Pwyllgor Cynllunio sy'n peidio â mynychu'r sesiynau hyfforddi yn cael eistedd ar y Pwyllgor Cynllunio nes bod yr hyfforddiant hwn wedi'i gwblhau. Bydd Aelod newydd o'r Cyngor yn ymgymryd â sesiwn hyfforddiant cyn iddo gael caniatâd i fod yn rhan o'r Pwyllgor Cynllunio.

14.2 Hyfforddi Aelodau eraill

- 14.2.1 Bydd hyfforddiant priodol ar gyfer Aelodau nad ydynt yn rhan o'r Pwyllgor Cynllunio yn cael ei drefnu er mwyn eu galluogi i gyflawni rôl yr Aelod Lleol yn briodol.

15.1 Ceisiadau Cynllunio gan Aelodau

- 15.1.1 Pan fo Aelod yn gwneud Cais Cynllunio, fe ddylai'r aelod Hwnnw gydymffurfio'n gyffredinol â Chod Ymddygiad Aelodau. Fodd bynnag, bydd gan yr Aelod hawl i gyfarch y Pwyllgor yn rhinwedd yr Ymgeisydd yn unol â'r Rheolau Siarad Cyhoeddus. Yn union ar ôl cyfarch y Pwyllgor, fe ddylai'r aelod adael y Siambr pan fo'r cais yn cael ei drafod yn unol â Chod Ymddygiad Aelodau.